

D Uni will eui WhatsApp-Chäts

TESCHT → Wie veränderet sich d Schprach? Wie gönd mir ufem Messenger mitenand um? Für en Undersuechig sammled d Forscher Bischpiil.

Vom Roland Gamp us Gueteschwil, ZH

Schpended Si de Wüsse- schaft «Nachrichte», schriibed d Schprachforscher imene Ufruef. Während sechs Wuche chan d Bevölkerig Unterhaltige iischicke. De Inhalt isch

«Date werded vertraulich behandelt.»

ganz egal, vom Feriefliirt bis zur Diskussion mit em Chef chan mer all Verläuf sende.

D Schprachforscher chönd di komplette Unterhaltige durläse. **Sie wend die sensible Agabe aber vorem Untersuech anonymisierere**, «persönliche Date werded absolut vertraulich behandelt», schriibeds inere Mitteilig. Fotis oder Schprachnotize söll mer nöd mitschicke, zum de Dateschutz nöd z verkompliziere.

Mit em gsammlte Material sölls luut Uni zum erschte Mal möglich werde, «di schprachliche Merkmal vo de WhatsApp-Kommuni-

kation wüesseschaftlich z beschriibe.» Bis jetzt fehl d Grundlag zu dere mobile Kommunikationsform.


Akzeptiert werded Nachrichten in Dütsch, Französich, Italienisch, Rätoromanisch und Englisch.

So söll sich zeige, welle Dialekt und welli Schprach wie oft iigsetzt wird. Zudem wend d

Forscher luege, ob mer normal SMS glich schriibt wie WhatsApp-Nachrichte. Zum Vergleich benutzeds tu usigi vo SMS, wo d Uni 2009 imne ähnliche Versuech gsammlt het.

Bi de Schtudie dörf jede mitmache wo es Smartphone het. Als Aschporn werded Priise under allne Teilnehmer verlost. ●

www.whatsup-switzerland.ch



Überforderet?
Die Lehrer sollen entlastet werden.

Kantonsrat will kei fixi Chli-Klasse

VORSCHTOSS → D EVP het per Initiative gforderet, dass es kei Klasse under 20 Schüeler meh sött geh. De Kantonsrat lehnt das hüt ab, die scht-arri Grenze segi nur schwer umsetzbar und würdi im Jahr 120 Millione Mehrchöschte verursache. Stattdesse tritt d Regierig uf en Gegevorschlag ii: Zur Entlaschtig söll en neue Pool mit 100 Vollziit-Schtelle gschaffe werde. Das choschti mit 15 Millione fascht zehmal weniger. Und seg trotzdem di besser Lösig als e fixi Grenze. Will mer gezielt die Schuele chan entlaschte, wo d Klassegrössi würkli es Problem isch. Hüt liit d Obergrenze bi 25 Schüeler (Primar oder Sek A) oder 21 Chindergärtner. gpr



Was schriibsch?
Das interessiert nöd nur din Fründ, sondern au d Uni.

2000 wend is Castle vom Takeshi

USBUECHT → Am Wuchenend schtiigt i de Badi Schluefweg s Revival vo de japanische TV-Kultshow us de 90er. D Kandidate müend sich möglichscht schnell dur en waghalsige Hindernisparcours kämpfe. Di erschti Usgab i de Schwiiz chunt guet ah, «i 8 Minute sind all Tickets verhaufft gsi», seit en Schprecher vo de «Toasted Challenge» zum «Züri Uderländer». 360 Teams à sechs Lüüt sind gmolde. Zueschauer werded nöd ha, nur Teilnehmer dörfed am Wuchenend id Badi. gpr



So känned mers us em TV
Takishi-Spillshow us Japan.

Fotos: Roland Gamp, ALMIDI.NET, Keystone, ZVG

Zum neue E-Bike gits Kafi vom Profi

KOMBI → «Velo Elsener» will Chunde d Warteziit mit Kafi versüesse. D Betreiber händ churzerhand es Lokal mit professionellem Barista iigrichtet.

Eeifachi Kafimaschine langi nöd als Zwüscheverpflegig für sini Chunde, findet de Christian Elsener (52). De Velohändler usem Seefeld het drum direkt über d Schtrass es zweits Lokal gmietet. «Mir verpfleged oisi Chunde mit italienische Snacks und Kafi.»

Die Wuche fiiret s «Ché» Eröffnig. **Willkomme seged nöd nur Velofahrer, «s Lokal stah allne offe, au Passante wo nüt wend chaufe**», seit d Christina Elsener (51) wo s Bistro mitbetriibt. Mitem Ché gäng en lang ersehnte Traum in Erfüllig. «Ich vermisse im Quartier Lokal zum dussehöckle und plaudere. Das Flair wemmer zugg is Seefeld bringe.»

Zudem sind neu alli E-Bikes im Bistro usgsch-

tellt. «Die Velos ligged extrem im Trend», seit de Christian Elsener. **Hüt fahri jede zehnti Chund elektronisch.** «D Modell sind aber irgendwo im Lade umegstande. Jetzt nutzemer di neu Flächi zum Uusschtelle.»

Sonigi Lade mit doppletem Agebot gäbis scho en Huufe. «Mir wend ois aber

dur d Qualität absetze und de Gäscht meh büte, als en eifache Chapsle-Kafi.» **Drum haends de Davide Civillo (44) us Italie isgtellt wo sit 20 Jahr professionell Kafi macht.** Nebed Espresso, Macchiato oder Cappuccino samt Topping will er frisch Piadine, Antipasti oder Focaccine abüte. gpr



«Traum erfüllt»
D Elseners i ihrem neue Kafi «Ché».